

HEADLINES (EVENING)

1. Election Commission of India-in kumin April thla atanga electoral roll Special Intensive Revision (SIR) kalpui tan hman tura inpuahchah turin Mizoram a hriattir.
2. Larsap, General VK Singh-a'n Mizoram chu hmarchhak biala khualzin pun chak berna state a nih thu a sawi.
3. Mizoram sorkar-in tun thla February ni 3 thleng khan MUHCS hnuuia Non Empanelled Hospital a damlo refer-te Bill cheng vbc 25, nuai 11, sing 5, sang 2, leh 17 a ba.
4. Prime Minister Narendra Modi-a'n India AI Impact Summit chu hmalam huna khawvelin AI thiltihtheihna a chhawr tangkai dan tur tarlanna a ni, a ti.

<><><>

SPECIAL REVISION

Election Commission of India chuan electoral roll Special Intensive Revision (SIR) chu kumin April thla atanga kalpui tan hman tura inpuahchah turin Mizoram a hriattir.

Mizoram tiamin state leh UT 22 a chief electoral officer (CEO) te chu Election Commission chuan April thla atanga SIR kalpui tan hman turin a hriattir a. He mi hma ngei hian inpuahchah vek turin a hrih a ni. Mizoram CEO pisa atanga thu dawn danin tun dinhmunah inpuahchahna hi thui tak kalpui-in an inpeih titih tawh a. Mizoram district 11-a assembly bial 40-ah polling station 1,353 a awm dawn a. SIR kalpui hnunhun ber kum 2004 kha chuan Mizoramah polling station 795 chauh a awm a ni. Kum 2004-ah khan Mizorama vote nei awm zat chu nuai 5, sing 5 sang 9 leh 124 a nih lai-in tuna electoral roll hman laiah chuan vote nei hi mi nuai 8, sing 7, sang 4 leh 45 an ni. Inpuahchahna kal mekah hian polling station siam rem hna zawh fel a ni tawh a, polling station pakhtah vote nei mi 1,200 aia tam awm lo tura ruahman a ni . DEO, ERO, AERO & BLO te training kalpui a ni tawh a. An hmun ruak pawh hnawh khah vek a nih tawh bakah tun thla ni 27 hian political party-te tan workshop buatsaih a ni bawh ang.

Polling Station siam rem hi Election Commission chuan a pawm tawhin ERONET-ah thun fel a ni tawh bawh a. SIR hnunung bera electoral roll pawh digital-a dahin chhiar theih a chhawp chhuah a ni tawh bawh a ni.

<><><>

CM'S BIRTHDAY

Vawiin hi Chief Minister Pu Lalduhoma pianchamphaphak a ni a, kum 77 a tlinna a ni.

Prime Minister Pu Narendra Modi chuan social media X –ah Pu Lalduhoma hi piancham chibai bukin hrisel taka rei tak dam turin duhsakna a hlan a Union Home Minister Pu Amit Shah pawhin Chief Minister hi piancham chibai bukin hriselna leh chakna nena Mizoram mipui rawngbawl zel thei turin duhsakna a hlan a. Duhsakna hlantu dang zingah Union Minister for DoNER Pu Jyotiraditya Scindia te, BJP MP Sambit Patra leh hruaitu dangte an tel a. Mizoram larsap Gen. Vijay Kumar Singh pawhin piancham chibai bukin Pu Lalduhoma chu hriselna tha, finna leh chakna atana malsawmna dawnga Mizorama remna leh muanna leh hmasawmna atana thawk zel thei turin duhsakna a hlan a ni.

Pu Lalduhoma hi kum 1949 February ni 22 khan Tualpui khua-ah a piang a. IPS-ah lutin a bansan hnu-ah kum 1984 khan Congress party zawmin Lok Sabha MP atan a tling a. Vawi 5 MLA atana thlan tlin niin kum 2023 khan Serchhip assembly bial atangin thlan tlin a ni leh a. A kaihhruai ZPM party chuan kum 2023 kum tawp lama

Assembly inthlanah hnehna changin hemi kum December ni 8 khan Mizoram Chief Minister atan lak luh ani.

<><><>

TOURIST FOOTFALL

Larsap General VK Singh-a'n Mizoram chu hmarchhak biala khualzin pun chak berna state a nih thu a sawi.

Thawhlehnia Assembly Budget Session hawna inkhawma thu a sawiah Larsap chuan kum 2025 April thla atanga December thla inkarah khan India ram chung leh tualchhung zinmi nuai 6, sing 7, sang 9 leh 607 leh ram dang atangin mi 9,606 in Mizoram an rawn tlawh tih sawiin, sorkar kum liamta ai khan khualzin zat hi za a 29.50 in a khum a ti. December thla chu khualzin tam ber tum niin, mi nuai 1, sing 3, sang 3 leh 520 in Mizoram an rawn tlawh tih sawiin, kum hmasa December thla nen khaikhinin za zela 122.11-in a pung a ti a. Mizoram chu hmarchhak biala khualzin pun chak berna state a nih mek thu leh, Sairang a rel a rawn luh hnuah phei chuan Mizoram chu hmarchhak biala khualzinte tlawh hlawh bera ni chho mek a ni a ti.

Larsap chuan Prime Minister Pu Narendra Modi pawhin Chief Minister Pu Lalduhoma Mizoram State Day chibai a bukna-ah, Mizoram tlawhtu pung chho mek chu lawmawm a tih thu sawiin, hei hian sum lakluh kawngah leh sum leh pai dinhmunah hmasawna a thlentir a ti a. Mizoram mipuite ngainatawmna leh mikhual laka thatna chuan khualzin tam zawk a hip ngei a rin thu a tarlang bawk a ni.

Mizoram Tourism Department-in an chhinchhiah danin, kum liamta 2025 chung khan Mizoramah zinmi nuai 8, sing 4, sang 1, 322 an lo lut a, chung zinga zaa 97.45, mi nuai 8, sing 1, sang 9, 838 te chu India state hrang hrang amite an ni a, midang sing 1, sang 1, 479 te chu ram dang mi an ni thung a, ram dang atanga Mizorama lo zin lut zingah Myanmar khua leh tui tam berin za zela 69.2, mi 7,945 an rawn zin a, USA-in dawtin mi 1, 091 an rawn zin a ni.

<><><>

ASSEMBLY SESSION

Naktuk Thawhtanni chawhma dar 10 leh a chanve atangin Assembly budget session chu chhonzawm leh a ni dawn.

Naktuk Assembly inkhawmah hian zawhna leh chhanna hun hman a ni ang a. Zawhna leh chhanna hun a tawp hnu-ah Chief Minister Pu Lalduhoma'n Mizoram Information Commission Report 19-na, House dawhkanah a dah ang a. Dr. Vanlalhlana'n Mizoram Goods & Services Tax (GST) Tax Act hnuai a hriattirna chhuah pahnih, House dawhkanah a dah bawk ang. Pu Jeje Lalpekhlu'a'n Committee on Petitions report 3-na Higher and Technical Education Department chungchang chu House-ah a pharh ang.

He mi hnu hian Pu Lalduhoma'n Sialkal Range Development Council Bill, 2026 Assembly ngaihtuah turin a chhawp chhuak ang a, sawiho a pawm tum a ni ang. Pu Lalnghinglova Hmar in The Mizoram Shops & Establishments (Regulation of Employment and Conditiona of Service) Amendment Bill, 2026 chu House a ngaihtuah turin a chhawp chhuak ang a, sawiho a pawm nghal tum a ni ang.

Tun tum Assembly inkhawm kal lai-ah hian sorkarin dan siam tur a ruahman 7 a lut tawh a. Bill 2 chu dan thar siam tur a ni a, 5 chu dan awmsa siam thatna tur a ni thung ani. Dan siam thar tur 1 leh dan siamthatna turte hi Assembly-a sawiho a nih hnu-ah pawm a ni tawh a. Tuna dan siam thatna lut tur zingah hian Tourism department thehluh dan siamthatna tur rawtna leh Mizoram State University dan siamthatna tur bill a lut tawh bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni. Naktuk zing dar 7 leh a chanve-ah Chanchinthar puan leh a ni ang.

<><><>

ASSEMBLY-MUHCS

Mizoram sorkar chuan tun thla February ni 3 thleng khan MUHCS hnuaia Non Empanelled Hospital a damlo refer-te Bill cheng vbc 25, nuai 11, sing 5, sang 2, leh 17 a ba.

Health Minister Pi Lalrinpuii chuan Assembly thutkhawmah ziaka zawhna chhangin kumin February ni 3 thleng khan Mizoram sorkar chuan MUHCS hnuaia Non Empanelled Hospital a damlo refer- mi sang 2, 837 te Bill cheng vbc 25, nuai 11, sing 5, sang 2, leh 17 a ba tih a sawi a, Mizorama private damdawi in zinga MUHCS empanelled la ni lo te inrem tumin an inbe mek tih a tarlang bawk.

Tun dinhmunah Mizoram chhunga mimal enkawl Empanelled Damdawi in 16 - JC Eye Hospital, Aizawl, Nazareth Hospital, Chaltlang, Aizawl, Nazareth Hospital, Ramhlun North, Aizawl, Redeem Hospital, College Veng, Aizawl, Synod Hospital, Durtlang, Aizawl, BN Hospital & Research Centre, Kulikawn, Aizawl, Eye Care Hospital, Dawrpui, Aizawl, Champhai D.M. Hospital, Champhai, MED-AIM Hospital, Champhai, Christian Hospital, Lawngtlai, Lawngtlai Lairam Christian Medical Centre (LCMC), Lawngtlai, Christian Hospital, Serkawn, Lunglei, Faith Hospital, Lunglei, John Williams Hospital, Lunglei, Serchhip Mercy Hospital, Serchhip leh Maraland Gospel Centenary Hospital (MGC), Siaha te bakah Day Care Centre pathum- Kidney 360° Superspeciality Clinic and Dialysis Centre, Bazar Bungkawn, Aizawl, Rapha Day Care Centre, Zarkawt, Aizawl leh Vohbik Day Care, Salem Veng, Aizawl te an ni.

Mizoram pawna private hospital 33 awm bawkin Silchar, West Bengal khawpui pakhat Barasat, Ghaziabad, Mumbai, Gurugram, Lucknow, Ranchi, Indore, leh Patna-ah te damdawi in pakhat theuh, Noida-ah damdawi in 2, Guwahati-ah damdawi in 4, New Delhi-ah damdawi in 8 leh Kolkata-ah damdawi in 10 te an ni.

<><><>

MANN KI BAAT

Prime Minister Narendra Modi-a'n India AI Impact Summit chu hmalam huna khawvelin AI thiltihtheihna a chhawr tangkai dan tur tarlanna a ni, a ti. Vawiin Akashvani-a Mann Ki Baat hun a hmanna-ah he thu hi sawiin ram hrang hrang hruaitute, industry lam hotu pawimawhte, thil siam chhuak mite leh Start-Up sector kalpuitute, AI Impact Summit-a tel tur hian New Delhi-a Bharat Mandapam-ah an rawn fuan khawm a ni, a ti a, AI lama India-in theihna sang tak a neih zia, khawvelin a hmuh phah tih sawiin Summit neih hun chung hian India-in Made in India AI Model pathum a tlangzarh a ti bawk.

Phone leh internet atanga inbumna, Digital Arrest leh Digital Fraud chungchang pawh Prime Minister hian sawiin bum hmange laka fimkhur a tulzia, mipui hnena wawi tam tak puanzar anih hnu pawha bum tawk an la awm fo chu a pawl tak zet a, ngaihdam theih chi a ni lo, a ti a, misualte chuan phone atanga dawt sawiin SMS leh link hmeh tur an thawn thin tih sawiin hetiang mite lak atanga fimkhur turin mitin a ngen a ni.

<><><>